

Berhubung soalan kedua Yang Berhormat, faktor yang telah dikenalpasti mengakibatkan kesesakan lalu lintas di Tambak Johor adalah melibatkan beberapa aspek seperti bilangan trafik yang sangat tinggi (anggaran 200,000 sehingga 250,000 pergerakan keluar masuk setiap hari), bilangan kaunter pemeriksaan dan kekuatan anggota bertugas, dan keluasan laluan masuk ke kompleks CIQ.

Sehubungan itu, pihak Kerajaan Malaysia melalui pihak Jabatan Imigresen Malaysia telah mengambil langkah jangka masa pendek dengan memaksimumkan bilangan kaunter yang dibuka bagi menjalankan pemeriksaan. Langkah ini dilakukan dengan membuka bilangan kaunter kereta penuh mengikut waktu puncak. Apabila waktu puncak di laluan keluar ke Singapura, bilangan kaunter di laluan masuk akan dikecilkan untuk menumpukan kekuatan anggota di laluan keluar.

Selain itu, langkah jangka panjang juga telah diambil oleh pihak Jabatan Imigresen. Langkah yang terlibat adalah:

- (i) Kompleks Sultan Abu Bakar menyediakan kemudahan laluan kontra yang telah beroperasi sejak tahun 2013 di mana kenderaan ringan dilaluan masuk ke Malaysia boleh menggunakan laluan keluar yang diubah suai bagi menambah bilangan laluan.

**Kemudahan ini beroperasi pada cuti umum dan musim-musim perayaan.**

- (ii) Menyediakan kemudahan Malaysia Automated Clearance System (MACS) di kedua-dua laluan darat Bangunan Sultan Iskandar dan Kompleks Sultan Abu Bakar. Walau pun sistem ini tidak dapat mengurangkan kesesakan secara menyeluruh, sistem ini membantu mengurangkan tempoh menunggu bagi pemegang kemudahan ini. Walau bagaimanapun, pengurangan tempoh menunggu ini hanya melibatkan penumpang-penumpang bas sahaja di mana pelawat boleh menggunakan *automated gates* di dewan pemeriksaan berbanding beratur di laluan pemeriksaan manual.**

**NO. SOALAN: 67**

**PEMBERITAHUAN PERTANYAAN BAGI JAWAB LISAN  
DEWAN RAKYAT**

**PERTANYAAN : LISAN**

**DARIPADA : DATO' SERI ANWAR BIN IBRAHIM  
[ PERMATANG PAUH ]**

**TARIKH : 16 JUN 2014**

**RUJUKAN : 6876**

**SOALAN:**

**Dato' Seri Anwar bin Ibrahim [ Permatang Pauh ]** minta **MENTERI DALAM NEGERI** menyatakan kewajaran pengharaman bahan-bahan terbitan seperti buku Perempuan Nan Bercinta karya Faisal Tehrani dan terjemahan Asal Usul Spesis oleh Charles Darwin yang dianggap membelakangi prinsip demokrasi dan semangat kebebasan berkarya.

## **JAWAPAN**

**Tuan Yang di-Pertua,**

**Penerbitan bertajuk “Perempuan Nan Bercinta” karya Faizal Musa (Faisal Tehrani) telah dikenakan tindakan di bawah Perintah Mesin Cetak dan Penerbitan (Kawalan Hasil Penerbitan Tak Diingini) mengikut Akta Mesin Cetak dan Penerbitan 1984 pada 9 April 2014 kerana memudaratkan ketenteraman awam dan ditegah pengedarannya di seluruh Malaysia.**

**Manakala penerbitan bertajuk “The Origin of Species - Asal-usul Spesies” terjemahan F. Susilohardo dan Basuku Hernowo (diterbitkan di Indonesia) telah dikenakan tindakan di bawah Perintah Mesin Cetak dan Penerbitan (Kawalan Hasil Penerbitan Tak Diingini) mengikut Akta Mesin Cetak dan Penerbitan 1984 pada 21 Disember 2006 kerana memudaratkan ketenteraman awam.**

**Berdasarkan pandangan dan perakuan Jawatankuasa Penapisan Bahan-bahan Penerbitan Berunsur Islam, Jabatan Kemajuan Agama Islam Malaysia, buku Perempuan Nan Bercinta mempunyai unsur-unsur yang ketara dalam mengangkat ajaran Syiah dan merendah-rendahkan mazhab Ahli Sunnah Wal-Jamaah yang boleh mengelirukan umat Islam serta menyalahi syariah yang ditetapkan dalam al-Quran dan al-Hadith.**

**Manakala buku terjemahan Asal-usul Spesis pula memberi gambaran mengenai asal-usul penciptaan mahluk yang bertentangan dengan ajaran Islam yang didapati bercanggah dengan Garis Panduan Penapisan Bahan-bahan Berunsur Islam serta pegangan Ahli Sunnah Wal Jamaah yang menjadi amalan umat Islam di negara ini.**

**Tindakan Kementerian Dalam Negeri mengenakan Perintah Larangan terhadap kedua-dua penerbitan berkenaan tidak wajar dilihat sebagai membelakangi prinsip demokrasi dan semangat kebebasan berkarya tetapi lebih menjurus kepada tindakan bagi memelihara kesejahteraan dan keselamatan rakyat serta ketenteraman awam sejajar dengan peruntukan undang-undang negara.**